

Filipi Ekalesia Azaḡa Mazao Paulo'a Mirihiro

¹ Eḡe Paulo zu Timoteo'a fefa 'adi mirihe'ohe. Eme'e Keriso Iesu veize gaue'ete'e azaḡa. Ebu fefa 'adi'e Filipi neḡano Keriso Iesu mone ra'ete'e azaḡa nidu'a, zu ibito zini'ete'e azaḡa*, zu diakono azaḡa veize tuḡure'ohe.

² Ibite gezo 'ahige reihi: Badi'a emeḡe Mama zu Zuhi'a Boro Iesu Keriso'a manōḡa zu zama roḡeḡa zini'eno'i!

Paulo'a Filipi neḡano ekalesia azaḡa u'ano Badi'a mazao manōḡa tauḡi ra'ohe zu zamare'ohe

³ Eḡe'a zae zamare'ete'e madaḡano bone, iḡaiḡa eḡe Badi'a mazao manōḡa tauḡi ra'ohe.

⁴ Eḡe'a zae nidu'a veize kurau'etene, iḡaiḡa matu'uheta kurau'ohe.

⁵ Mazaḡa zae'a hari manōḡa ḡadahe mae ḡihinirote'e madaḡanono'o onao izidi, eḡe'a hari manōḡa haramoga veize danahe onainu.

⁶ E'e hube hune 'ahige rae zamare'ohe. Badi'a ani, zae bo'aḡano gau manōḡa fureniro, 'ouge haḡae onamo, Keriso Iesu'a bare onai'uma madaḡa me'uma. E'e madaḡano zae zamao furenirote'e gauḡa manōḡa haḡae hauḡi'uma.

⁷ Za'e eḡe zamao iḡaiḡa radiu'ohe. E'ano'o eḡe'a zae nidu'a mazao 'ahige zamare'eta'a'e manōḡa. Mazaḡa zae nidu'a, Badi'a'a inirote'e gauḡa eḡe'a haḡaoga veize danahe onainu. E

* **1:1** ga bisofu

ḡu'a neḡano'o 'ada radiu'ete'e zamaḡano zuni, kotao hari manoga birirote'e madaḡano zuni, ebu hunio hari manoga'e mene tugahe harame inarinate'e madaḡano zuni danahiro.

⁸ Keriso Iesu'a zae zamare'ete'e teige, e zae nidu'a zamare'ohe. Eḡe'a 'ouge rata'a'e, Badi'a ane edeḡa, e huga ḡoere'ohe.

⁹ Ebu e zae veize 'ahige rae kurau'ohe: zae'a Badi'a faifaine ederoga zu nagini'e duduga ga ve'oga horone ederoga, ebu 'ouge haḡae'ena'a, zae'a zae bare zamarotite'ete'e haḡaiḡani'a bororu onamoga.

¹⁰ Ebu e zae veize 'ahige rae kurau'ohe: Zae radone zamḡano nagini'e manoga ederoga, zu zamaze dehenoga, zu haḡai sau'a mene hunezuni haḡaoga, ebu 'ouge haḡae onamo, Keriso'a bare onai'uma madaḡa.

¹¹ Ebu Iesu Keriso'a danazadu zae ḡabone'e duduga da'o re'uma. Eḡe'a 'ahige kuranata'a'e, vaze'a zae haḡai manoga horonadu, Badi'a ḡubane'ena'a zu niḡa mae iḡihinoga veize.

Paulo'a ḡu'a neḡano radiu'ete'eano'o hari manoga'i'a bororu onamiro

¹² Nego nabudi, e ura, za 'adi edero'il! Aduga ḡehaḡa eḡe mazao fureru'ete'ano'o, hari manoga'i'a bororu onamiro.

¹³ Ebu eḡe'a Keriso u'ano ḡu'ano radiu'eta'a'e, Roma zuhi'aḡa ne enoga taufe edau'ete'e azaḡa, zu vaze nunu ḡehaḡani'a edere ḡouriro.

¹⁴ Zuhi'a Boro mone ra'ete'e azaḡa'e, eḡe'a ḡu'ano radiu'ena'a, edau gigaru'ete'e u'ano,

Zuhi'a Boro mazao fie gigaranadu, mene ri-hau'ena'a, Badi'a ġoere inare harame'ohe.

¹⁵ Vaze nu'a Keriso hariġa harame'eta'a'e, ze eġe gau u'ano 'ahi'ahi ma'ohe, zu vitihhi ra'e'ohe. Rehano vaze nu'e eġe danahhi radu, hari manoġa harame hunihi radu, zama manoġa hina harame'ohe.

¹⁶ Zama manoġa hina harame'ete'e azaġa'e, hari manoġa biroga veize, Badi'a'a e ġu'ano mae zouhirote'e, ederadu, zeġe zamarone eġe mazao teadu harame'ohe.

¹⁷ Rehano 'ouge 'ahi'ahi ma'ete'e azaġa'e nize boro reihi radu Keriso hariġa harame'ohe. Ze harame'eta'a'e, zamaze'e mene deheġa. Ze 'ouge'ena'a, eġe'a ġu'ano aduga hide'ete'e'a bororanoga veize rae, zamare tauġe'ohe.

¹⁸ A nagini veize? Zeġe'a harame'eta'a'e, zamaze'e duduġa ga mene, ago zamaro'i! Ġoere boro'e Keriso hariġa harame'ete'e.

¹⁹ Ebu e e'e u'ano matu'e'ohe. Ebu e zama mone zuni matu'e ona'uma, mazaġa e edeġa, zae'a eġe veize kurau'ete'eano'o, zu Iesu Keriso Vine Zaġoġani'a danahe'ete'eano'o, e'e Badi'a'a ġu'anono'o mae buhi'uma.

Paulo ġabone'e Keriso teite

²⁰ E'e 'ahige zamare'ena'a hube hune guhiu radiu'ohe: Eġe mazao nagini'a fureraune zu, e'e mene mazaġarohi'uma. U e'e iġaiġa inare ġoere'ete'e teige, izidi zuni inare ġoeri'uma. Ebu e ġabode radine, ga rudaune, eġe haġai nidu'a'ono'o vaze nu'a Keriso nigunoga urate'ohe.

²¹ Mazaḡa eḡe mazao'e, ḡabode radiu'eta'a'e, Keriso teite radiu'ohe. Ebu rudaune'e, manōḡa hune hidi'uma.

²² Rehano eḡe'a ḡabode radine, eḡe gau u'ano vase ḡehaḡani'a Badi'a ḡoere egadu, ḡabone hidi'uma. E'ano'o e aḡu'a, no'e ibiḡano onamine manōḡa.

²³ E zamahe aheu nemaḡano. E ura'e raha 'adi modadu, Keriso teite radihi. 'Ougine manōḡa tauḡi.

²⁴ Rehano e zae veize raha 'adao ḡabode radine, manōḡa. 'Ougine zae danazoga idaḡa.

²⁵ E hube hune 'ouguine manōḡa rae zamare'ohe. E edeḡa, e'e ḡabode radadu, zae nidu'a teite radi'uma. Ebu zae'a Keriso mazao fie'ete'e'a bororanoga veize, zu zae'a fie'ete'ea, matu'uze'a bororanoga veize danazi'uma.

²⁶ 'Ougadu eḡe'a bare amine, za'e eḡe u'ano Keriso Iesu nigune'ena'a, matu'e ruda'uma.

Badi'a mone ra'ete'e azaḡa'e ḡahunoneḡa manōḡa hidi'uma

²⁷ Ḡoere boro tiba'e, 'ahige reihi: Za, Keriso hari manōḡa mae ḡihine'ete'e vazeḡa ra'ete'e haḡaiḡano da'o onamo'i! 'Ougine, eḡe'a ḡiazi' amine, ga haba faḡanono'o harize igine zuni, e ederi'uma; Za'a zamaze tibnadu edau gigaru'ete'e, zu zamaze tibano neadu hari manōḡa aḡiro hau'ete'e azaḡa'ono'o hari manōḡa inare biretite'ete'e.

²⁸ Ebu aduga zini'ete'e azaḡa mene rihoze'ete'e, zu zae'a inare ḡoere'ete'e eḡe ederi'uma. Zae'a mene rihau'ete'e haḡaiḡa, aduga zini'ete'e azaḡa'e Badi'a'a ruizi'uma, u

za'e ḡabone hidi'uma. 'uguḡa nidu'a Badi'a mazao'no'o furera'uma.

²⁹ Za'e Keriso mazao fie'ete'e ḡahunoneḡa manoḡa da'o Badi'a'a mene zeneha, rehano Keriso u'ano aduga hide'ete'e ḡahunoneḡa manoḡa zuni zeneha.

³⁰ Eḡe'a hidirote'e adugaḡa zae'a horonirote'e heuḡa, zae'a e'e adugaḡa hide'ohe. Ebu eḡe'a ize e'e adugaḡa hide'ete'e izidi zae'a igi'ohe.

2

Za'e zamaze tibunadu, zae'a bare nize mae ovoro'i

¹ Za Keriso teite tibuzate'eano'o inare'ohe? Keriso'a zae zamarate'eano'o za manōgahe? Za Vine Zaḡoḡa teite radiu'ena'a, ane teite matu'e tiburue'hehe? Za vaze mazao manore'e'hehe, zu vetuḡazi'e'hehe?

² Za 'ouge rado'idene, zamaze'e zamare ḡiriḡiro'i! Zamarone tiba hina zamaro tito'i! Zamaze tibunadu gauo'i! Za'e 'ouge haḡae'ena'a, eḡe matu'u borofe huno'i!

³ Ago inaho'i! Nize boro reihi ra'ete'e zu zae'a bare niguzoga rae, ḡau 'ahoga ago haḡao'i! Rehano zae'a bare nize mae ovoradu, vaze zamare ḡihizo'i, u za'e ze 'u'uḡano rae zamaro'i!

⁴ Zae zae'a manōga hidoga veize da'o ago zamaro'i, rehano vaze'a manōga hidoga veize zuni zamaro'i!

⁵ Za'e, radoneze zamaḡano haḡaize zu zamaroneze'e Keriso Iesu'a haḡaidote'e teige haḡao'i!

- 6 Ibite bone Keriso ane huga, Badi'a teite idagā rehana, Badi'a teite idaru'ete'e niḡa boro mene obone giganiro.
- 7 Ebu niḡa boro modadu, vaze raena'a, tuḡure vazeḡa teigiro.
- 8 Ebu ani vazeo reirotene, ane'a ane bare mae ovoiro.
Ebu Badi'a ḡoere mene vari'ohaudu. Ane'a ruda'uma ibiḡa rehana onaminu.
Ebu vaze haḡaiḡa sau'a boro teige, satauroniro ebu rudaro.
- 9 E'ano'o Badi'a'a ani mae ḡihine hitana huneo ohoniro, ebu ni ḡihi'a haro.
E'e niḡa'e ni 'ahoga 'ahoga nidu'a vitinoga.
- 10 Badi'a'a 'ougirota'a'e, adureo radiu'ete'e, zu rahao radiu'ete'e, zu raha 'u'uḡano radiu'ete'e nidu'a'a Iesu matu'o hau'ena'a, ḡuḡuroga veize.
- 11 Ebu ḡuḡurate'e nidu'a'a 'ahige rae furenoga veize: Iesu Keriso'e Zuhi'a Boro.
Ze 'ouge haḡae'ena'a, Badi'a emeḡe Mama ni mae ḡihi'uma.

Ḡabone hidi'uma ibiḡano inare onamo'i

12 E'ano'o vazehe manogā nidu'a, zae'a Badi'a ḡoere ibiḡano iḡaiḡa onamidote'e teige, rihau rudau'ena'a, ḡabone hidi'uma ibiḡano inare onamo'i! U mene eḡe'a zae teite radiu'ete'e zamaḡano da'o, rehana izidi eḡe o'o'ano zuni borofe inare gauo'i!

13 Mazaḡa zae'a Badi'a ura haḡaiḡa haḡaoga veize Badi'a'a zae zamao gaue'ena'a inarazi'ohe, zae'a uratadu e'e haḡae'ohe.

14 Ġau nidu'a zamaġano ago ġoere'ena'a zu ta'iro tite'ena'a, haġao'i!

15 'Ougine za'e vase duduġa tauġi re'uma, zu vase'a mene debaze ġoeri'uma. Ebu izidi ega, haġai ve'oġa azaġa ġunuġano, sau'ani 'ahoga mene haġaadu, Badi'a ubuga ubuga teiġe, radifo. Za'e, e'e ġunuġano buzuva'a adureo agaru'ete'e teiġe agarano'i!

16 Ebu ġabone tuġutuġu hidi'uma ġoe'a vase veize rae fureno'i! 'Ougine, e'e, Keriso'a bare ovai'uma madaġano, eġe'a zae bo'aġano gau aduga haġaidota'a'e hugeita raena'a, zae u'ano matu'e ruda'uma.

17 Ebu zae'a Keriso mazao fie'ete'e u'ano aduga hide'ohe rehano, zae'a Zuhia Boro veize gauine, eġe'a zae u'ano rudaune e matu'e'ohe. Zu e ura zae nidu'a teite matu'e tiburatihi.

18 E'ano'o zae zuni eġe teite matu'e tiburatihi.

Paulo'a Filipi azaġa u'a Timoteo tuġuni'uma

19 Zuhi'a Boro Iesu'a uratine, e zae vaġe Timoteo ariga tuġune ame'ohe. 'Ougadu ane'a baradu, zae hari me'odonine eġe zuni matu'i'uma.

20 Zea'a faine radiu'e ga mene rae Timoteo'e hube hune zamare'ohe. 'Adama ani heuġa zae zamare'ete'e e'e vazegā 'ahoga o'o'a.

21 Mazaġa vase ġehaġa'e Iesu Keriso'a urate'ete'e ġauġa mene zamaradu, zeġe hune'a urate'ete'e ġauġa zamare borofe'ohe.

22 U za edeġa, Timoteo'e haġai manoġano Badi'a gau haġae'ohe, mazaġa ani hari manoġa haramoga veize eġe teite faifaine gaue onainu.

Ani'e ubugani'a moga danane'ete'e teige eḡe teite gaue onainu.

²³ E'ano'o 'adao eḡe mazao nagini'a fureratite'e ederi'udu'u, Timoteo zae vaḡe tuḡuni'uma.

²⁴ Ebu eḡe zuni zae vaḡe ariga ami'uma ra'ohe. E'e ibiḡa'e Zuhi'a Boro'a haḡaoni'uma rae hube hune zamare'ohe.

Paulo'a Epafrodito Filipi azaḡa vaḡe tuḡuni'uma ra'ohe

²⁵ U Efaforodito, ani eḡe nego. Ani eḡe teite gaue'ohe, zu uti azaḡa teige eḡe teite hari manōḡa bire'ohe. Ani'e zae'a eḡe u'a tuḡuniro. E'ano'o ani onaadu e ḡau nunu mene idaru'etene ani'a danahinu. Rehano izidi Efaforodito'e zae vaḡe bare tuḡunine manōḡa ra'ohe.

²⁶ Mazaḡa ani zae nidu'a ḡiazihira radu zamare hune'ohe. Zae'a ani ibite uginirote'e egadu, zamaze'a adudaro. Ane'a za 'ougirote'e igirotene, ani zamaḡa mene idararo.

²⁷ Ani'e hube hune ugi boro'a madu nariga rudaro. Rehano Badi'a'a vetuḡaneadu fainiro. 'Ougadu e'e, aduga zamaḡano, aduga hena mene bare ragatiro. Badi'a ani Epafrodito da'o mene vetuḡaniro rehano, eḡe zuni vetuḡahiro.

²⁸ E'ano'o e ura, ani'e ḡarihe zae vaḡe tuḡune amihi ra'ohe. 'Ougine, za ani teite hidadu matu'i'uma, zu eḡe zama'a adudu'ete'e'a ufira'uma.

²⁹ E'ano'o Zuhi'a Boro' ibio, matu'o hau rune'ena'a, mae ḡihino'i! Za ani heuḡa vazēḡa nigunine manōḡa!

³⁰ Mazaḡa Keriso gau u'ano ani nariga rudaro. Ani'a zae'a danahifote'e gauḡa haḡaadu, nariga rudaro.

3

Radone zamaḡano haḡai boro'e Keriso edere'ete'e

¹ Nego nabudi, e 'ahige bare reihi: Za Zuhi'a Boro teite tiburanate'e u'ano matu'o'i! Eḡe'a ibite iraduguzirote'e ḡoe'a, bare bare to zinihi ra'ohe. A'e eḡe mazao mene gau boro, zu a'e zae'a mene ve'oroga veize.

² Badi'a aḡu'a zu haḡai sau'a haḡae'ete'e azaḡa veize ḡiano'i! Ze'e Iuda azaḡa. Iuda azaḡa'e zae so'oze'ena'a, ahiri rana iḡuri haḡaine, Badi'a mone re'uma ra'ohe. Rehano ze'e foure ahiri ru'i tauḡe'ohe. A'e huga o'o'a.

³ U eme'e hube hune Badi'a mone ra'ete'e azaḡa. Eme'e Badi'a Vine Zaḡoḡani'a ibitofeadu Badi'a mazao kurau'ohe. Eme Keriso Iesu ni-gune'ohe, e'ano'o ahiri rana iḡuri haḡae'ete'e. Zu Badi'a ubuḡa rouga radu zeḡe edeḡano gauete'e azaḡa eme'a mene zamare borofe'ohe. A'e huga o'o'a haḡaiḡa.

⁴ Rehano vase 'ahogani'a ani'e vase nagiga ra'ete'e moneo Badi'a'a mae ḡihini'uma ra'ete'e borofe zamarine, eḡe zuni eḡe moneo borofe hune rouga idaḡa.

U vase 'ahogani'a ahiri gauḡa ḡehaḡa haḡae'ohe rae zamarine, a'e eḡe'a vitinoga.

⁵ E'e fureranadu mada fu'o zu uḡidu fare meirotene, ahirihe rana iḡuri haḡairo. E'e Isaraela vazega, Beniamini iduhu vazega, ebu

Heberu mariga huga huga. Iuda goro ḡoe'a moneo'e Farisea vazegā, goro ḡoe'a faifaine haḡaido.

⁶ Badi'a veize inare'ete'e moneo'e ekalesia azaḡa eḡe'a zamahe nidu'a hina sausauzido. Iuda azaḡa goro ḡoe'a faifairu haḡaadu, duduḡa ra'ete'e moneo'e, mene ve'oniro.

⁷ Eḡe'a ahi ḡauga'e manogā tauḡi zu ḡau boro bagaḡa rae zamarinu. Rehano Keriso'a eḡe veize rudarote'e ederirotene, 'uguḡa haḡaiḡa'e huga o'o'a haḡaiḡa rae zamarinu, mazaḡa e'e Keriso ederihi reinu.

⁸ Ebu e 'ize bare reihi. Ibite Badi'a'a matu'oga veize rae zamare haḡaidote'e haḡai'a nidu'a'e huga o'o'a ra'ohe. U Keriso Iesu, eḡe Zuhi'a Boro, ani'e inihu edere'eta'a'e, manogā boro bagaḡa. E'e, Keriso u'ano haḡaihe amahiḡa nidu'a modiro. Ebu 'uguḡa haḡaiḡa'e busi rae zamare'ohe, e'e Keriso mone reifine,

⁹ zu ane teite tiburafine. E'e izidi eḡe inarao goro ḡoe'a haḡaadu, Badi'a ubumao duduḡa rae, mene ra'ohe, rehano Keriso mazao fie'ete'eano'o Badi'a ubumao duduḡa rae ra'ohe. A'e Badi'a ane'a 'ouge ra'ohe, mazaḡa eḡe'a Keriso mazao fie'ete'e u'ano.

¹⁰ E ura'e Keriso faifairu ederihi, zu ani'a runeono'o bare ḡabodirote'e gigi'aḡa ederihi, zu ane zaharanirote'e teige eḡe zuni zahararatihi, zu ane'a rudarote'e teige eḡe zuni haḡai sau'a moneono'o rudau vaḡinihi.

¹¹ 'Ougadu e nougihi reine zuni, eḡe'a Keriso teite runeono'o bare ḡabode iḡunadu, e'e ḡaboneḡa hina onamihi ra'ohe.

Zamamone oname hohono'i

¹² E'e, 'uguḡa haḡaiḡa nidu'a haḡae hauḡeha rae, mene ra'ohe, zu e'e Keriso teiḡe duduḡa hune rae mene ra'ohe. Rehano e'e haḡaiḡa haḡae hunihi rae ize inare'ohe, mazaḡa, e'e Keriso hune teiḡoga veize, Keriso Iesu'a eḡe meiro.

¹³ Nego nabudi, e'e Keriso teiḡe huneha rae mene zamare'ohe. Rehano e'e, ḡau tiba 'adi haḡae hunihi ra'ohe: E'e, ḡaruni moneo haḡairote'e ḡauḡa nidu'a mene zamare'ohe. Rehano zama mone ḡauḡa da'o zamare'ohe. A'e Keriso ederadu, ane teigoga veize inare gaue'ohe.

¹⁴ E'e Keriso hune teiḡoga veize inare oname'ohe zu ḡonagano Badi'a'a naeḡa ini'uma. E'e naeḡa'e Badi'a'a huhe'ete'e zu adure zamahe iti'uma, mazaḡa Keriso'a eḡe veize gau haḡairo.

¹⁵ E'ano'o emeḡe nidu'a Badi'a mazao fiadu zamarone manoḡa meirote'e azaḡa'e, 'ahige zamari'uma. Ebu haḡai nu zamaḡano zae'a nufe zamarine, a'e zuni Badi'a'a zamazeo doḡo'ani fureno zini'uma.

¹⁶ Rehano ḡoere boro'e emeḡe iniuiniu'e Badi'a'a ihofirete'e idunaḡano haḡae onami'uma.

¹⁷ Nego nabudi, eḡe teiḡo'i zu emeḡe'a ihozirote'e haḡaiḡano radiu'ete'e azaḡa faine ḡiane'ena'a zeḡe zuni tuhuzo'i.

¹⁸ Mazaḡa vaze ḡehaḡani'a agire teiḡe Keriso agireni'ohe. E'e ibite 'uguḡa azaḡa haḡai 'ai ḡae ḡehaḡa me'odo ziniro rehano izidi zeḡe haḡai zamaradu nihe vuḡani'a onae'ena'a bare ra'ohe.

¹⁹ Ze'e ḡonagano rudaune, irerogao diuḡi'uma. Ze'e ahirize'a urate'ete'e haḡaiḡa da'o haḡae radiu'ohe. Ebu mazagarō haḡaiḡa haḡae'e rehano, a'e zeḡe'a bare ite'ohe, zeḡe'a zamare'ete'e ḡauḡa nidu'a'e raha 'adi ḡauḡa.

²⁰ Rehano emeḡe radone haba'a'e adureo. Ebu Zuhia Boro Iesu Keriso eme ḡabofi'uma vazēḡa, e'ano'o ovaite'e guhine radiu'e'uma.

²¹ Ani ḡau nidua'a zuhi'ani'et'e inaraḡa obone'ohe. Ani'a bare ovaite'e madaḡano, e'e inaraḡa hina ahirife ruhura'umate'e ani'a mae nufadu, ahi'a iziḡa manōḡa heuḡa rifi'uma.

4

¹ E'ano'o nego nabudi, Zuhi'a Boro mazao fiadu edau gigarano'i! E'e za zamare rudau'ohe zu giazihī ra'ohe. Ebu za'e eḡe matu'ohi'ohe, zu eḡe'a niguze'ete'e azaḡa.

Inara Ḡoe'a

² Euodia zu Sintike, e za umize'ohe, za'e Zuhi'a Boro moneo reirote'e azaḡa bobo zamaze tibuno'i.

³ Eḡe teite gau tibano gau'e hune'ete'e vazēḡa, ḡa'a roḡae aheu e'e danazite'e eḡe'a umie'ohe. Ze'e hari manōḡa haramoga veize eḡe teite inare gaido. Ze'e Kelemenito zu eḡe teite gaidote'e azaḡa nunu teite gaido. Ebu zeḡe nidu'a ni'e Badi'a'a ḡabone bukaḡano mirihiro.

⁴ E bare bare 'ahige ra'ohe: Mada nidu'a Zuhi'a Boro'a zae veize haḡairote'e zamaradu matu'o'i!

⁵ Vaze mazao roḡeru rado'i, vaze nidu'a'a za'e roḡeḡa rae horozoga. Za 'adi zamaro'i! Zuhi'a Boro'e 'ariga bare onae'ohe.

6 Ġau ni 'ahoga moneo zamaze 'ago adu-dano'i! Rehano nagini'a furerano'idene, e'e ġauġa nidu'a'e Badi'a mazao umido'i! Ebu za kurano'idene iġaiġa Badi'a Mazao manoġa tauġi ro'i!

7 Ebu Badi'a'a zama roġeġa zini'uma, e'ano'o zamaze'e mene aduda'uma zu mene riha'uma, mazaġa za'e Keriso Iesu teite tiburaro 'ahine. Zama roġeġa a'a'e boro bagaġa zu hoe'aġa, vaze'a zamaroġa zu mene idaġa.

8 Nego nabudi, ġoere ġonagano 'ahige reihi! Haġai 'ahiguġa zamare onamo'i! Huga ġoere'ete'e haġaiġa, gubatite'ete'e haġaiġa, haġai duduġa, zama deheġa haġaiġa, vaze'a matui'uma haġaiġa manoġa zu vaze'a rae ġihini'uma haġaiġa manoġa. Nagi haġai manoġa tauġi ga vaze'a niguni'uma haġaiġa manoġa horono'idene e'e zamare'eno'i!

9 Zae'a eġe mazaono'o ederirrote'e, zu meirrote'e, zu igirote'e ġoe'a nidu'a, zu eġe haġaio horonirrote'e haġaiġa nidu'a, zae radone zamaġano haġao'i! Ebu zama roġeġa rife'ete'e Badi'aġani'a zae teite radiu'e'uma.

Filipi azaġani'a Paulo danane'ena'a ġau tuġuriro

10 E'e Zuhi'a Boro mazao matu'e rudau'ohe, mazaġa faġa hune radate'e enogano, za bare eġe zamaradu eġe ferehidote'e ġauġa tuġurodo. E edeġa, za hube uratinu rehano, danahe'ete'e ibiġa mene hidiro.

11 E ġau nu'a ferehe'ete'e u'ano, 'ouge mene ra'ohe. Mazaġa eġe mazao nagini'a fureraune,

a'e gāu'a ferehe'e ga mene, rehano e edereha zamahe'e idağa da'o.

12 E edeğa, gāu o'o'a zamağano radiu'ete'e radoneğa, ga gāu ġehağa zamağano radiu'ete'e radoneğa. Radone nagiga zamağano zuni, e'e matu'e radoga ederiro, ogomu ġehağa ga o'o'a, gāu ġehağa ga o'o'a.

13 E'e, radone nagigano zu gāu nidu'a hağaoga idağa, mazağa Keriso'a inarağa ini'e 'ahine.

14 Rehano e 'ada aduga hide'ete'ea, zae'a danahe'eta'a'e manoga tauği.

15 Filipi azağa, za edeğa, zae'a hari manoga ġadaheğano igirote'e madağano bone, e, zae haba Makedoniaono'o igunirotene, zae Filipi ekalesia azağani'a da'o gāu nu ini'ena'a danahiro, u neğa 'ahoga 'ahoga ekalesiağa azağa'e mene 'ougiro.

16 Ege'a Tesalonika neğano radiunute'e zamağano zuni, e gāu'a ferehinutene, za ege veize bare bare gāu tuğurido.

17 E'e zae'a gāu nu bare tuğuronoga veize 'ahige mene ra'ohe. Rehano zae'a danahe onamadu, Badi'a'a naeğa zinite'e'a bororanoga urate'ohe.

18 E'e ferehe'ete'e gāuğa nidu'a 'ada. A'e boro bagağa. Zae'a ege veize tuğurirote'e gāuğa, Epaforodito'a odohe onairotene, gāuhe'a ġehararo. Zae'a tuğurirote'e gāuğa'e Badi'a ġahunohau'ete'e hohoğa manoga heuğa. A'e Badi'a'a mae ġihine'ohe, zu matu'e'ohe.

19 Ege Badi'a'a, ane gāuğa ġehağa bagağano'o, Keriso Iesu u'ano borofe zini'uma, gāuze'a fereze'ete'e madağano.

²⁰ Emeḡe Badi'a, emeḡe Mama nigune'eno'i, onamo tuḡutuḡu! Hube hube hune 'ougo'i!

Paulo'a Filipi kuru azaḡa veize uhiu tuḡure'ohe

²¹ Iesu Keriso mazao fie'ete'e azaḡa nidu'a veize uhiu tuḡure'ohe. Zuhi'a Boro mone ra'ete'e azaḡa eḡe teite 'ada radiu'ete'e'a uhiu tuḡure'ohe.

²² Adao Badi'a veize ra'ete'e azaḡa nidu'a'a zae veize uhiu tuḡure'ohe. Roma zuhi'aḡa* neo Badi'a mone ra'ete'e azaḡa zuni uhiu tuḡure'ohe.

²³ Zuhi'a Boro Iesu Keriso ḡahunone manoḡani'a zae vine teite radiu'eno'i!

* 4:22 Niga, Kaisara

Uare Bible
Portions of the New Testament in the Uare language
of Papua New Guinea
Nupela Testamen long tokples Uare long Niugini

Copyright © 2017 Wycliffe Bible Translators, Inc.

Language: Uare

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-05-15

PDF generated using Haiola and XeLaTeX on 18 Apr 2025 from source files dated 13 Dec 2023
c398f744-e34b-525a-a9fe-d04e84ab7b13